

Date – 10/11/2024

Time - 18:30 -18:40Hrs

**REGIONAL NEWS BULLETIN**

**HEADLINES (EVENING)**

1. Bana Kaih (Handholding) Scheme hnuai November 4 thleng khan progress partner nih tumte dilna 6,010 a lut tawh.
2. Mizoram sorkar chuan state human rights commission din turin chak takin hma a la mek.
3. Excise & Narcotics Department leh Zemabawk East JAC thawk dunin nimin khan Heroin kg 3 leh gram 700 chuang an man.
4. BJP leh tangrual pawl Maha Vikas Aghadi-ten Maharashtra assembly inthlan neih tura an manifesto an tlangzarh.

<><><>

**HAND-HOLDING**

Sorkar flagship programme, Bana Kaih (Handholding) Scheme hnuai November 4 thleng khan progress partner (tanpuina dawngtu) ni turin dilna 6,010 a lut tawh a, November tawp lamah tanpuina (loan) hmu turte thlan tum a ni.

Bana Kaih (Handholding) hnuai dilnate chu an project kaihnawih sorkar department-te'n endika an thlitfim hnuah Handholding Scheme-a thuneitu sang ber (apex body) - Mizoram State Policy Coordination Committee (MSPCC)-in tanpuina dawng turte a thlang dawn a ni. MSPCC hotute sawi danin Bana Kaih hnuai November 4 thleng khan progress partner ni tura dilna 5,010 a lut tawh a, Dilna lut tawh zinga 5,961 chu mimal dilna a ni a, pawl anga dilna 49 a awm a, Dilna te chu an project kaihnawih department tina a khawihtu nodal departmental committee-in an endik mek thu an sawi.

MSPCC hotute chuan, department-te'n dilna zinga hmu tlak nia an ngaihte chu MSPCC-ah tanpuina hmu turin an rawt dawn an ti a, Department-te chu tun thla (November) ni 15 ah an hmachhawp thehlut phawt turin an ti tih sawiin an hmachhawp chu tun thla tawp lamah ngaihtuah an tum an ti a, progress partner tura thlante tan training buatsaih a nih dawn thu leh training zawhah loan pek a nih dawn thu an sawi bawk.

Bana Kaih hnuai hian scheme kalpuitu implementing department 16 a awma; chung department 16-ah chuan eizawna tur trade 155 a awm a, November 4 thlenga dilna lut 6,010 zinga 2,312, za zela 38 point 47 chu Commerce & Industries department hnuai dilna a ni a; Commerce & Industries department-ah hian trade hrang hrang 43 a awma, implementing department 16 zinga trade tam berna a ni.

(Corr)

<><><>

**CM REVIEW**

Chief Minister Pu Lalduhoma chuan Minister of State Prof. Lalnilawma enkawl department - Horticulture, Rural Development leh PHE department te hnathawh a thlirpui.

A hmasa berah Horticulture Department hmalakna enho a ni a. 'Bana kai' ruahmanna hnuai a thlai thar lei tur thlan chhuah pali zinga pathum hi Horticulture hnuai mi a nih anga an inbuatsaihna leh an hmalakna dang te chipchiar takin Chief Minister hma-ah an tarlang a. Horticulture department hian an hmalakna zawng zawng Bana Kaih ruahmanna hnuai luhpui (converge) vek a nih tur thu an tarlang. Kum khat kal ta chhung khan an department hnuai loneitute'n Dragonfruit atangin cheng vaibelchhe 6 leh nuai 96, Balhla atangin cheng vaibelchhe 4 leh nuai 17, Lakhuihthei atangin cheng vaibelchhe 2 leh nuai 52, Tomato atangin cheng vaibelchhe 5 leh nuai 74, Dawnfawh atangin cheng vaibelchhe 3 leh nuai 49 leh Zikhlum atangin cheng vaibelchhe 6 leh nuai 57 vel an tharchhuak niin an sawi.

Rural Development Department hnathawh enho chhonzawm leh a ni a. Chumi hnu-ah PHE hnathawh enho a ni a. PHE department hian JJM hnuaiah tuilakna hna 852 an kalpui a. An zinga 657 hi tui chhuk luang hmanga lak a ni a, 188 hi ni-tha hmanga siam ni-in electric hmanga pump 7 a awm bawk. Heng zinga 832 hi zawhfel tawh niin hna kal mek 20 an la nei a. NABARD sum atangin Water Supply Scheme kal mek 11 an nei bawk. Hna thawh mek zingah Aizawl, Lunglei, Mamit leh khawpui danga tuilak hna an thawh mek te, Tawi tlang tuihna gravity hmanga thawh mek te, Swatch Bharat Grameen hmalakna te pawh chipchiar takin Chief Minister hmaah hian an sawi a ni.

**(DIPR)**

<><><>

**SHRC**

Mizoram sorkar chuan state human rights commission din turin chak takin hma a la mek.

Home department hotute hnen atanga thu dawn danin October thla khan state human rights commission dinna tur hriattirna hi Mizoram sorkar chuan a chhuah tawh a. Hemi atan hian hnathawh 16 lakna tur pawh sorkarin a pawmpui tawh bakah commission dinna tur atana thil tul dang pawh chak taka bawhzui mek a ni. Gauhati High Court chuan state human rights commission din tur hian Mizoram sorkar chu na taka nawrin September ni 6 khan thla 2 chhunga commission din ngei tur hian thu a pe a. A din lo a nih chuan na taka hrem a nih tur thu-in a vaukhan tawh a, a chhan chu commission dinna tur hi kum tam tak Mizoram sorkarin a tikhawtlai tawh vang a ni a. Chief Justice Vijay Bishnoi leh Justice Michael Zothankhuma te thutna division bench thuan sorkarin human rights commission din an tikhawtlai chu a lungawithlak loh thu na takin an sawi chhuak a. Hnathawh tur lak chungchang sorkarin a sawi pawh chu thu mai, a taka chantir la ni lo niin High Court chuan a ngaih tur a tarlang a ni.

Mizoram state human rights commission din chungchang hi kum 2021 khan public interest litigation (PIL) hmangin Zofa Welfare Organization (ZWO) president Rev. Robawia chuan a lo thehlut tawh a. PIL-ah hian Protection of Human Rights Act, 1993 tlawhchhana Mizorama state human rights commission din ngei a nih theih na'n ngenna an siam a ni. High Court chuan Supreme Court-in kum 2015 a Dilip Kumar thubuai thehluh behchhana tiktura thupek dinglai awm chu Mizoram sorkar hian a la tipuitling lo a ni a ti. A hma hian Mizoram sorkar chuan state human rights commission dinna atan hian hna 29 siam tura sorkara dil chu kumin August ni 8 khan 16 siam phalsak a nih thu a sawi a. High Court chuan hei hi a tawk lo ni a sawiin Protection of Human Rights Act, 1993 tlawhchhan a thla 2 chhunga din a nih loh chuan court zah lohna thubuai chu Mizoram sorkar lakah ziaklutin hremna na tak pek a nih tur thu a hriattir a ni.

**(Desk)**

<><><>

**MUSIC FESTIVAL**

Leitlangpui Music Festival, Lunglei khawpui a November ni 14 atanga tan turah inbuatsaihna chak taka kalpui mek zel a ni.

Mizoram sorkar chuan Leitlang Music Festival hi tun thla November ni 14 atanga ni 16 inkarah Kawmzawl Helipad leh a chhehvelah a buatsaih dawn a. He Festival atan hian cheng Nuai 25 vel ruahman ni-in sum hi NEC atanga dawn tur a ni a. Inbuatsaihna kawng hrang hranga kalpui mek niin zai leh lam hmanga bakah hnam lam hmuh tur a awm dawn a, dawr hrang hrang 60 chuang zet siam a ni dawn a ni. He Music Festival hi Mizoram Sorkar chuan Serkawn zai kutpui lo awm tawh thin chawinun na'n leh khualzin mite hip na'n a a buatsaih a ni.

Lunglei leh a chhehvelah hian khualzinte tlawh theih turin hmun tam tak chei bawl a ni a, hmun hlui tam tak tuai thar niin mi tam tak hip khawm turin theihtawp chhuah mek zel a ni.

**(Thanghmingliana Renthlei, PTC Lunglei)**

<><><>

**HEROIN HAUL**

Excise & Narcotics Department leh Zemabawk East Joint Action Committee (JAC) thawk dunin nimin khan Heroin kg 3 leh gram 700 chuang an man.

Excise & Narcotics department thupuangtu Pu Peter Zohmingthanga hnen atanga thudawn danin Excise & Narcotics Department leh Zemabawk East Joint Action Committee (JAC) thawk dun chuan nimin zing dar 3:30 vel khan Zemabawk East, Kanan Thar vengah Heroin Kg 2 leh gram, 557 (Hawng 220) leh a neitu nia puh mi pahnih-Thangmuansein (30) leh Thangkhsawm (22) Tuithang khua, Tedim township, Myanmar-a khawsa ve ve ni a inchhalte chu an man. Excise & Narcotics Department leh Zemabawk East Joint Action Committee (JAC) thawkdunte tho hian nimin vek zing dar 6:30 khan Zemabawk East, Kanan Thar vengah tho hian Heroin 1 kg leh gram 177 (Hawng 94) leh a neitu ni a puh Sowab Uddin (23) Tukar Bazar, Patharkandi, Karimganj District, Assam-a khawsa mek ni a inchhal an man bawk.

Nimin Inrinni a Excise & Narcotics Department leh Zemabawk East JAC-te thawk dunin Heroin an man zawng zawng hi Kg 3 leh gram 734 (Hawng 314) zet a ni. Heroin vanga mante hi Narcotics Drugs &

Psychotropic Substances Act, 1985 tlawhchhanin thubuai siamsak an ni a, nimin vek khan Special Court (NDPS Act), Aizawl District-ah thawn nghal an ni.

**(Desk)**

<><><>

**BJP'S MANIFESTO FOR MAHARASHTRA RELEASED**

Maharashtra assembly inthlan neih tura BJP leh eptu party, Maha Vikas Aghadi-ten thlan tlin an niha state tana hma an lak dan tur tarlanna, manifesto chu vawiin khan an tlangzarh a, BJP manifesto, Sankalp Patra hi BJP hruaitu senior, Union Home Minister Amit Shah-a'n Mumbai-ah a tlangzarh a ni.

An manifesto-ah hian BJP chuan Laaki Bahin scheme hnuaiia thla tina tanpuina sum chu cheng 1500 atangin cheng 2,100-a tih san te, loan ngaihdam te, zirlai nuai 10 tan stipend cheng sing 1 pek te leh kawlpheha chhit man, zaa 30-a tihhniam anih tur thute an tarlang a, heng bakah hian kum 5 lo awm tur chhungin hna vbch 1 siam an intiam bawk.

Cong President, Malikarjun Kharge-a'n Tangruual pawl Maha Vikas Aghadi (MVA) manifesto, Mumbai-ah a tlangzarh bawk a, tlangzarh inkhawmah hian NCP(SP) hruaitu, Supriya Sule, Shive Sena (UBT) hruaitu Sanjay Raut-a leh MVA-a tel hruaitu pawimawh dangte an tel a ni.

MVA chuan sorkarna an siam chuan hmeichhiate hnenah thla tin cheng sang 3 pek an tiam a, thalai hna neilote tan thla tin tanpuina cheng sang 4 pek te, loneitute loan puk, heng nuai 3 thleng ngaihdam leh sorkar hna nuai 2 sing 5 siam an tiam bawk.

**(NSD)**

<><><>